

湖湘

熊治祁 编

湖南人物年谱

③

湖湘文库编辑出版委员会 湖南人民出版社

文库

熊治祁 编

湖南人物年谱

③

湖湘文库编辑出版委员会

湖南人民出版社



湖湘文库
乙编

《湖南人物年谱》 各册谱主

第一册：周敦颐（1017—1073） 朱 英（1417—1485）
刘大夏（1436—1516） 李东阳（1447—1516）
陈洪谟（1476—1569） 陈思育（1532—？）
陈纯德（1594—1644） 陶汝鼎（1601—1683）
刘象贤（1607—1677） 王夫之（1619—1692）
陈鹏年（1663—1723） 王文清（1688—1779）
张 坊（1698—1774） 方 桂（1702—1786）
陈大受（1702—1751） 张九钺（1721—1803）
方应清（1729—1785） 邓显鹤（1777—1851）

第二册：陶 澍（1779—1839） 魏 源（1794—1857）
梅钟树（1798—1841） 何绍基（1799—1873）
邹汉勋（1805—1854） 罗泽南（1808—1856）
王母鲍氏（1808—1882） 曾国藩（1811—1872）

第三册：胡林翼（1812—1861） 左宗棠（1812—1885）
张时澍（1816—1898） 郭嵩焘（1818—1891）
李续宾（1818—1858）

第四册：刘长佑（1818—1887） 梅鉴源（1824—1884）
曾国荃（1824—1890） 吴大廷（1824—1877）
陈钟英（1824—1880） 王 鑫（1825—1857）

娄云庆 (1826—1912)	黎培敬 (1826—1882)
王闳运 (1832—1916)	黄舒曷 (1834—1901)
涂启先 (1834—1899)	王先谦 (1842—1917)

第五册:

李光久 (1845—1899)	冯锡仁 (1849—1910)
瞿鸿禛 (1850—1918)	皮锡瑞 (1850—1908)
黄凤岐 (1851—1934)	释敬安 (1851—1912)
曾纪芬 (1852—1942)	夏思痛 (1854—1924)
吴恭亨 (1857—1937)	罗锡畴 (1858—1892)
易顺鼎 (1858—1920)	赵启霖 (1859—1935)
谭人凤 (1860—1920)	翁传煦 (1860—1897)
齐白石 (1864—1957)	叶德辉 (1864—1927)
谭嗣同 (1865—1898)	禹之谟 (1866—1907)
罗杰 (1866—?)	唐才常 (1867—1900)
欧阳知 (1867—?)	

第六册:

梁焕奎 (1868—1930)	熊希龄 (1870—1937)
黄兴 (1874—1916)	杨度 (1875—1931)
何叔衡 (1876—1935)	刘揆一 (1878—1950)
谭延闿 (1880—1930)	林修梅 (1880—1921)
宋教仁 (1882—1913)	蔡锷 (1882—1916)
宁调元 (1883—1913)	傅熊湘 (1883—1930)
李抱一 (1887—1936)	邓中夏 (1894—1933)
蔡和森 (1895—1931)	向警予 (1895—1928)
柳直荀 (1898—1932)	罗亦农 (1902—1928)
段德昌 (1904—1933)	朱湘 (1904—1933)
左权 (1905—1942)	叶紫 (1912—1939)

第三册目录

胡文忠公（胡林翼）年谱	梅英杰编	1
左文襄公（左宗棠）年谱	罗正钧编	129
先考雨生府君（张时澍）年谱编略	张惟俊 张惟佶编	525
郭嵩焘年表	杨锡贵编	603
李忠武公（李续宾）年谱	傅耀琳编	738

胡文忠公(胡林翼)年谱^①

梅英杰 编

卷一

公姓胡氏，讳林翼，字貺生，一字润芝。元武宗时，有曰汉清者，自江西泰和县迁湖南宁乡之麦田；六传至思敬，徙益阳九里泉交河之长冈村，遂为益阳县人。家世良农，其孙文亮始读书岳麓，明成化时隶学籍，学者称麓山先生。○见吴县潘世恩《胡麓山先生墓志》，此文公已楷书入石。又五传至光璧，当崇祯癸未，张献忠陷长沙，从蔡忠烈道宪守城殉难。○胡氏《谱》不详，据郭氏嵩焘《行状》书之。无子，以侄柳溪讳其辙为嗣。四传至民典，性笃孝，亲歿，辑《孝经疏义》以志哀慕，是为公之高祖；妣萧氏、范氏、唐氏。○《益阳县志·本传》云：“胡民典字映塘，事亲笃孝，亲歿，辑《孝经疏义》。年七十一卒。”家书丙辰《与族人书》云：“吾宗自高祖之时，胡门乃大。诚斋公苦学毕生，特堂公首开读书先声，积而未发，非才学不如人也，其四世之不贪、不诈、不淫、不巧，人尽知之矣。”按：诚斋先生讳多珩，为公曾叔祖，其教授子弟，一仿苏湖。特堂为先生子，讳显璋，嘉庆辛酉拔贡，充龙洲书院院长，弟子如蔡先生用锡、周先生扬之及公父管事公，皆出其门。见《益阳县志》。曾祖讳多吉，字襟江，以端正著

① 原件为清光绪三十一年宁乡梅氏抱冰堂刊本。

闻；妣杨氏。○《益阳县志·本传》云：“胡多吉才识倜傥，制行端正，乡里有争讦者，皆不敢以姓名相告。”

祖讳显韶，字律臣，县学生，居贫，教授，卒祀乡贤；妣汤氏，继妣刘氏。○《湖南通志·本传》云：“胡显韶，字律臣，诸生。孝友性成，博涉经史，与从弟显璋分教里中子弟，以身体力行为主。著有《紫筠园诗文集》。” 按：请祀乡贤为同治四年。见《益阳县志》。

父讳达源，字云阁，翰林院编修，官至詹事府少詹事；妣汤氏，庶母杨氏、刘氏。○《湖南通志·本传》云：“胡达源，字云阁，嘉庆二十四年进士，廷试一甲第三人，授编修，历官詹事府少詹事。畿辅饥，设粥厂于青白口。达源以学士领厂事，仿富弼青州法：人给五日粮，男女异路，升斗筹粟，亲为验发。同官以非成例，达源以闻，上嘉纳之。艰归，卒，著有《弟子箴言》十六卷、《闻妙香轩诗文集》四卷。” 曾文正《箴言书院记》云：“道光戊戌，通籍于朝。湘人官京师者，多同时辈流，而少詹事益阳胡云阁先生独为老师祭酒。乡之人就而考德稽疑，如幽得烛，众以无限。” 左文襄《箴言书院碑铭》云：“余维詹事公积学累善，信于家邦，笃生巨人，为国藩辅。” 按：汤太夫人为公祖母女侄，父礼宗，乾隆丙午举人，后以公贵，追赠如其官。见《益阳县志·封荫表》。

三代皆以公贵，累赠光禄大夫，妣皆一品夫人。先世聚居里仁桥胡家弯，乾嘉之际，公曾祖襟江先生昆弟奉母唐太孺人，五世同居，分占东西，生齿繁衍。○《家谱》多珩《家庆图诗序》云：“乾隆甲寅正月二十一日，吾母唐太孺人八十有七寿辰。其时，佐翼甫三岁，五世同堂：显巍兄弟子侄十人居西屋，珩及显璋等八人居东屋。”

宅前丹枫一株，虬枝交翠，广被数亩，盖数百年物也。襟江先生悦其美荫，尝歌啸其下。○《家谱》先生《古枫篇》有句云：“挺兹殊异姿，俯视桃与李。吾庐未有前，托根何时始。吾庐既有后，美荫常如此。苍苍数百年，乔柯郁乡里。树木与树人，栽培同一理。”后有莲蕊两开之异。○闻己卯、乙未两次作花，灿烂如红莲，至今父老犹艳称之。先生

有子四：长显巍，字玉峰；次即乡贤公；次显冈早世；次梧冈显岐。

玉峰先生务农业，孝友诚悫，治家有法度，故乡贤公得一志授经课子，不问生产有无。初娶汤太夫人，生詹事公兄弟，年仅三十五岁而卒。○《家谱》默希先生祭公母汤太夫人文云：“乾隆乙卯，吾父与伯兄同补弟子员，而吾母适歿。时仲兄年十二，叔兄九岁，潘甫六龄，衣食寒暑胥吾嫂氏调护之。”

詹事公居长。次达澍，字甘原，嘉庆丁卯举人，历官华容、绥宁县学教谕，迁辰州府学教授。次达灏，字春藻，长沙府学附生。次达潘，字默希，道光乙未副贡。兄弟胚胎家学，能文章，时有四甫竞爽之誉。○按：詹事公初字清甫，时甫、京甫、季甫则诸弟别号也。见《春藻府君行述》。

玉峰先生既以力田起家，子妇内外，下逮工作恒数十百人，饬饷井臼，以饬妇事，无敢或逸。公母汤太夫人暨诸娣姒后先来归，早作晏寝，日有常程。均劳替休，治酒食以食田功者，几三十年。○《遗集》卷三十戊午《陈请终制疏》云：“臣家世力田，耕读相承。臣生之始，臣母操井臼，日治百人食，以即田功。”乡里皆曰：“胡氏一门雍穆，耕读相承，其男女勤且贤也如是，是其将兴乎！”

仁宗嘉庆十七年壬申，公一岁

六月初六日酉时，公生于益阳十九里长冈村胡家弯。○《箴言书院志·经始篇序》云：“先宫詹生林翼也晚。”按：《家谱》公有女儿二人。长适贺永修，辛酉生，长公十二岁。次适刘宗海，丙寅生，长公七岁。公生时，詹事公年三十五，汤太夫人年三十七，故云晚也。是年，詹事公仍读书岳麓书院。○按：詹事公弱冠隶学籍，读书麓山十年，为罗鸿胪典弟子。嘉庆庚午，学使李宗瀚考取优贡，明年自京归，仍往读也。左文襄祭公文云：“我生于湘，公产于资，岁在壬申，夏日冬时。詹事、文学，

读书麓山，两家生子，举酒相欢。” 按：文襄是年十月生，公生以六月，故云夏日冬时。文学，文襄父春航先生也。

嘉庆十八年癸酉，公二岁

嘉庆十九年甲戌，公三岁

嘉庆二十年乙亥，公四岁

公颖慧异常，詹事公将赴京，抱谒先祠，期无废教。○《书院志序》云：“林翼甫襁褓，先宫詹以优贡就京兆试，族戚之祖饯者咸集。先宫詹抱林翼谒于先祠，而告于大父律臣公曰：‘是儿状貌类颖慧者，他日幸赖先泽，或能自立。然豫教之道，某其无敢废。’”

詹事公先考取优贡，拟再入京读书国子监。○《闻妙香轩文集·长郡会馆志序》云：“嘉庆辛未，达源以优贡试礼部，是此次再入京也。”

按：清制，恩、拔、副、岁、优五贡皆得入监肄业，谓之贡监。后王氏先谦为祭酒，请复明举监制，令留京举人一体收录。

仲父甘原先生亦当会试礼部，九月，遂偕行。舟车旅食之费，玉峰先生以时饮给，无忧阙乏。是年，叔父春藻先生入长沙府学。

嘉庆二十一年丙子，公五岁

公天性肫挚，乡贤公偶游乡里，必牵裾随行，入夜辄同寝处，乡贤公奇爱之。○乡贤公家书云：“林翼好，但喜多言，又好跟脚，乡里有请者必随行，夜必同寝。八月十四日书于柳汁堂。时抱林翼坐侧。”

是年，詹事公入监肄业，月课五冠其曹，文誉顿起。○按：《益阳县志·文苑传》云：“蔡用锡，嘉庆癸酉拔贡，肄业国子监，与胡达源齐名。时云帆先生亦共读也。”仲父甘原先生亦考取宗室官学教习。

嘉庆二十二年丁丑，公六岁

乡贤公授公《论语》，教之识字学书，亦有法度。○见家书。

嘉庆二十三年戊寅，公七岁

是年，詹事公顺天乡试得举。

嘉庆二十四年己卯，公八岁

始入塾读书，塾师为胡星堂泽溥。

随侍乡贤公益阳志馆。安化陶文毅澍一见惊为伟器，以第七女静娟字之。○严氏树森撰公《年谱》云：“乡贤公携公志馆，安化陶文毅公以给事中观察川东，取道益阳，馆岐市，往谒乡贤，见公惊为伟器，曰：‘吾已得一快婿。’遂以贺夫人所生女字之。行间名礼，公方八岁，夫人五岁，拜于堂上，彬彬有礼。”益阳龙潭蔡氏藏文毅丙申《与云帆先生书》云：“七女婿幸入翰林，深感吾师教诲之力。”按：公家书中每称静娟夫人。

是年，詹事公以一甲三名进士及第，授翰林院编修。

嘉庆二十五年庚辰，公九岁

从乡贤公读书。九月，随母汤太夫人入京，季父默希先生往送。

时詹事公官翰林，清贫特甚。汤太夫人至，犹日主中馈，不改恒度。○戊午《陈请终制疏》云：“臣父嘉庆道光年同供职京师，臣母犹主中馈。”既自淬厉于学，而教公极严。谓为学端自蒙养始，亟授以儒先性理书，蚤夜督责，不少宽假。○《书院志序》云：“先宫詹之学由宋五子上推孔孟之旨，尤严于公私义利之际，始于切近，以致远大。尝谓为学自蒙养始，故其教人必以朱子《小学》、《近思录》为先。及林翼受书，则一以是为教，蚤夜督责，无少暇。然林翼方稚，昧勿克率。”郭氏《行状》云：“九岁省詹事公京师，即授以儒先性理之书，而公少负才气，不甚措恩也。”

宣宗道光元年辛巳，公十岁

默希先生留京应乡试，授公读。

是年，詹事公充实录馆纂修官。

道光二年壬午，公十一岁

仍从季父读书。九月，默希先生北闱再黜，遂南归，延彭先生在潮授读《礼记》。○见詹事公家书。

是年，詹事公充实录馆提调官。仲父甘原先生教习期满，改就教职，是岁选授华容县学教谕。

道光三年癸未，公十二岁

从文先生舒耀读书。○字定斋，醴陵县举人。

是年，仲父赴华容任，默希先生亦挈眷同往就读。○见公从弟栾翼撰《副贡君行述》。

道光四年甲申，公十三岁

从贺先生光黼读书。○字岁南，益阳岁贡。

是年，詹事公以实录告成，补授国子监司业，乡贤公就养华容学署。○见詹事公家书。

道光五年乙酉，公十四岁

从贺先生熙龄读书。○字蔗农，善化人。时官监察御史。

道光六年丙戌，公十五岁

从蔡先生锦泉读书。○字春帆，广东顺德人。时官编修。

八月，乡贤公就养入京，姊夫刘宗海亦来就婚。○见詹事公家书。

道光七年丁亥，公十六岁

从吴先生赞读书。○字伟卿，武进人。官员外郎。

是年，刘宗海病歿京寓。○见乡贤公家书。

道光八年戊子，公十七岁

从乡贤公读书。为文操笔立就，旁通曲畅，自达其志。○郭氏《行状》。

五月，詹事公充云南乡试正考官，闱中拜督学贵州之命。○詹事公家书云：“八月二十六日，闱中递到谕旨，命督贵州学政。”事毕，以十月朔抵贵阳受印。

公应顺天乡试，荐卷不售。○乡贤公十月樊城家书云：“林翼乡试荐而未售，仅挑誊录，然亦可谓矢无虚发。”詹事公遣使迎养。

十二月，乡贤公遂挈公至自京师。

道光九年己丑，公十八岁

居贵阳试院，时从郎先生葆辰游。○字苏门，安吉人。官贵东道。

道光十年庚寅，公十九岁

随侍乡贤公回里，旋就婚于桃花江陶氏别墅。

詹事公曩与同里蔡先生用锡久旅京师，服其学行，至是，乡贤公遂命公执贽其门，读书二十里龙潭口之竹屋子，与先生子伍巍、增潜昆弟晨夕观摩，所诣大进。先生教人务为有用之学，不专重文艺，而于兵略、吏治尤所究心，故公师事两年，涵濡渐渍，

服膺终身。○淑浦严正基《蔡先生家传》云：“用锡字云帆，孝友鲠直，嘉庆癸酉拔贡，晚授石门教谕。湖北巡抚胡林翼以湘中夙儒，素诸兵略，疏荐擢内阁中书，年七十八卒。弟子如胡林翼、劳崇光、唐际盛、周辑瑞，皆知名。”

龙潭蔡氏藏公丁巳《上云帆师书》云：“林翼一知半解，无当于时。惟素蒙教训，未尝一息敢忘君国艰难。连年调兵筹饷，智尽能索。刻下兵力虽强，积欠已逾百万，天时人事，悚惧日深，吾师忧乐关怀，尚乞时加训诲。”又戊午十二月蕲州《与蔡稚芸兄弟书》云：“鄂、皖军事，此番元气太伤。刻下军情貌如昔日，外实中虚，以人才消乏故也。吾心独伤，人不能喻。吾师高年，侍奉须厚。昔年之志，本欲于碧云山里结庐二三间，从吾师读书，以销余年。今国事多难，吾愿已违。而江汉为吾宗国之屏，捍卫亦殊不易，姑尽吾心力之所能及而已。”观此可知公师友风谊之笃。

是年九月，詹事公迁翰林院侍讲，季父默希先生入县学。○《副贡君行述》云：“庚寅始为诸生，年四十矣。”

道光十一年辛卯，公二十岁

蔡先生用锡授经陶氏，公仍从受学。

五月，沅湘大水，益阳濒湖，堤垸尽没，饥民塞途。公恻然闵叹，亟诣县令贾亨晋请按灾区编户口，劝富民出钱粟以赈。有尼之者，公上书乡贤公，陈其利害。已而，散米俵食，全活甚众。○是年《上乡贤公书》云：“秀才便当以天下为己任，此一腔恻隐之心，越读书越忍不住，况孙素以安民利物为志者。孙处家，于一切奢侈之事未尝妄费，此祖父及父母所亲见而深知者。此事商之县公，云于被水各垸飭本地保甲造户口册，分上、中、下三户。上户不管；中户有钱无米者，减价出卖；下户钱米俱无者，给以米。量户口之多寡，有不实者，责成保甲。又选本地士绅协同办理，一以镇地方，一以免保甲之欺罔。上、中二乡之不被水者，不与焉。即下乡之未成灾者，不与焉。龙阳、沅江之流民，不与焉。已请官通知邻县，因同被水灾，不能再受外县之流民也。此发赈减价之大概也。但

浣子水尚未退，中、晚二种，大约难期，现西水将近又长，此湖乡之大累。将来无底之壑，有何期限？已商县公，拟以一月为度，约到青黄相接时也。或谓一月之后，如晚谷不熟，则又要逃水荒。不知救一日性命，即了一日事情。且现在逃荒者到富家，富家并无米可散。到新收时，则有米矣。此发米之期限也。地痞不可不严查，但不恤民饥，则乱民有所藉口，而无以责之。且流民无食，则地痞一呼，从而和者不难即至，窃恐饥寒所迫，流民可一变而为乱民。以德安良，以威服暴，不可不察也。陶家已诺捐二千，亦非勉强，况外舅素来慷慨，孙于伊家有通财之义，且事关大体，有不得不如此者，亦非慷他人之慨也。周家如今有人倡头，不得不捐，但多寡不可定耳。其余典铺、行户，自孙一倡，无不踊跃从事，数万金不难立致。以至诚感之，以大义责之，以危盲动之，以赏劝诱之，苦口婆心，热肠浩气，壮胆宽肩，人安得不动、安得不从耶？此事议出县公，十数日无一人开捐者。孙痛斯民之颠连困苦，每中夜奋起，至于呜咽。恨深执鄙吝之人，故愤不可遏，如一出倡之。至将来事体，自当请有齿德者掌之。而一切行止出于官，不得代斫伤手也。仲尼云：‘博施济众，尧舜犹病。’可见世间事力所不能及者，圣人无如何，天地亦无如何。力所能及而不为，是不仁也。但处己当廉，济物当宽，非以钱为好也，要用之当乎理、得乎时耳。观流离道路之形，何忍不出？有经理妥当之法，何必不出？即以一县之利害得失较之，又何敢不出？既出矣，事妥矣，明晨即可归矣。若有一毫好事之心，是全不知世间有羞耻者。孙所自信，亦祖父大人所必信者。此事出于孙之意，见无一人赞之，但沮之者不下十数人。而孙自以为泰山崩于前而不动，麋鹿奔于左而不顾，亦可谓毅然不移矣。”按：公弱冠自黔归里，常处婿乡，适值淫潦，出图拯救。其恻隐之怀，豪迈之概，具见此书，故悉录之。证以《益阳县志·祥异篇》“道光十一年，大水，民饥”一语，情事适合。

秋，应乡试报罢。陶公子慧寿殇，文毅召公赴江宁。○龙潭蔡氏藏陶文毅是年八月《与詹事公书》云：“得贵阳寄书，知校试事竣。拟即回里省亲，天伦至乐，莫过于斯。贱眷先拟八月来吴，适因水灾，江路难行，且俟腊底春初耳。七女弱小，从未离母，此时依依膝下，恐难随侍进京。鄙

意且同林翼与贱眷来吴，明岁由此走王家营入京亦甚便。如林翼秋闱已获隽，则先同尊輿入都，小女仍于明秋专人送京何如？儿子明年仍请云帆先生教书，若得林翼共读，启发当易也。”据此，知公是年曾应乡试，明年随外姑赴江宁，情事显然。考新化邓氏显鹤《陶公子慧寿哀辞》有云：“道光改元之明年，陶公为安徽布政使，年已四十五，始生子慧寿。及总督两江，遗夫人携公子归省先茔，居益阳桃花江里第。慧寿甫十岁，以喉痹殇。”云帆先生《陶慧寿墓碣》云：“道光十年冬，尚书以书来属余授公子读，未及期而公予殇。”则云帆先生是年馆陶氏，公居婿乡仍从受学也。公子殇以九月，故文毅八月寓书有仍请先生教读之语。及慧寿殇，先生亦归矣。

道光十二年壬辰，公二十一岁

春初，外姑贺太夫人还江宁，公偕夫人往送。留居节署，亲见文毅措施，又尝举林公则徐、伊里布，公请密荐为两江替人，陶文毅深器之。○《遗集》卷六十四己未《致官揆帅书》云：“林翼幼年即见外省督抚，惟陶文毅、林文忠与祁竹轩、卢厚山之心术德量与中堂之心术德量同。又林翼幼年因见陶文毅，请其密保林文忠、伊莘农先生作两江替人，文毅深以为然。”按：公以九岁入京，中间自京赴黔、由黔返里，逾冠始至江南，其曰幼年见陶文毅，当为此时情事。《遗集》卷十丙辰《附陈左郎中韩知府才略片》云：“臣与兵部郎中左宗棠同受业于前御史贺熙龄之门，深知其才学过人，臣曾荐于前两江总督臣陶澍、前云贵总督臣林则徐，均称为奇才。”考公与左公订交在癸巳，其荐之文毅似又是在是年后也。

是年三月，詹事公还京复命。四月，擢詹事府右春坊右庶子，以原衔充日讲起居注官。五月，派充数习庶吉士。七月，转补左春坊左庶子，旋迁翰林院侍讲学士。

道光十三年癸巳，公二十二岁

正月，公偕夫人自江宁入京。○据严氏《谱》书之。其先年曾否应南北乡试，无从考证。

是时，宣宗在位，恭俭率下，喜言安静。大臣承望风旨，庸默保位。朝野恬熙，靡然以科第禄仕相矜尚，益务粉饰承平，讳盗容奸，莫可究诘。

公既长，聪强豪迈，于书无所不读，然不为章句之学，笃嗜《史记》、《汉书》、《左氏传》、司马《通鉴》暨中外舆图地志，山川阨塞、兵政机要，探讨尤力。

是岁二月，湘阴左文襄宗棠以会试至京，公一见定交，相得甚欢。每风雨连床，彻夜谈古今大政，论列得失，原始要终，若预知海内将乱者，辄相与歔歔太息，引为深忧。见者咸怪詫不已，詹事公则淳淳交勉，益以矫轻警惰为诫。○左文襄祭公文云：“我甫逾冠，获举于乡。见公京师，犹蹶文场。纵言阔步，气豪万夫。我歌公骂，公步我趋。群儿睨视，詫为迂怪。我刚而褊，公通且介。”又《箴言书院碑铭》云：“余游京师，亲公杖履。勖言淳淳，以故人子。”又云：“余与侍郎，齐年逾冠。意气方新，不可抑按。公引墨黻，更落以斧。矫轻警惰，饬其气宇。”

按：两公针芥之契，盖始于此。其时，公尚未隶学籍，屡黜乡试，故云“犹蹶文场”也。

是年二月，詹事公转补翰林院侍读学士，奉命视赈青白口，旋以大考优等，擢詹事府少詹事。九月，派充武会试副考官，失察正考官白镛中卷错误，降补翰林院侍讲。○见吴钟骏撰《墓志》及家书。按：公庚子家书云此次因人受累，与癸巳年如出一辙，盖指此也。适但氏妹春芝生。

道光十四年甲午，公二十三岁

宁乡梅公霖生，○讳钟澍，英杰大父也。时官国子监学正。与詹事公友善，是岁馆内阁协办侍读张君延闳家，○字麓门，长沙人。教其公子伯笏，○字子搢，仕履见《湖南褒忠录》。詹事公因命公来受学。

○先大父是年二月家书云：“我馆张宅，宾主水乳，师生沆瀣。而胡云阁同年之世兄林翼亦以文字相商，一乐也。”湘潭王氏闾运《梅礼部家传》云：“君本与文忠父同举，文忠师事之，及入翰林，乃在文忠后。”

是年十月二十三日，伯祖玉峰先生卒，寿七十七岁。

十一月，詹事公转翰林院侍读。○是年公《上乡贤公书》云：“本月初一日，父大人升转侍读，孙榜后，在寓用功。”按：公自戊子至是年曾屡应乡试。

道光十五年乙未，公二十四岁

玉峰先生赴至京，詹事公悲痛欲绝。正月，乃遣公南归，祭奠兼应试。

四月，抵长沙。贺先生熙龄方主讲城南书院，公因留居斋中。○詹事公是年《与春藻默希两弟书》云：“得书，知从蔗农先生游，讲院人多，在外觅屋，甚好。林翼正月二十二日启程，约四月可到省，若能于蔗农先生斋内同住更善。”

六月，学使龚公维琳○字春溪，晋江人。按临长沙，公取入县学。

八月，举行恩科，应本省乡试。正考官刑部直隶司郎中固始王公庭兰，副考官翰林院修撰吴县吴公钟骏。○是科《四书》首题：“季康子问政于孔子，孔子对曰：‘政者，正也。子帅以正，孰敢不正？’”次：“天地之道可一言而尽也。”三：“既而幡然改曰：与我处畎亩之中，由是以乐尧舜之道。”诗题：“赋得晓汲清湘然楚竹，得然字。”公卷出零陵县知县但公文恭房，○字梓村，蒲圻人。中试第四十名举人，季父默希先生亦列副榜。

十二月，启行入京，留江宁度岁。时陶文毅方述职京师，独蔡先生用锡暨湘潭周公诒朴同居节署，公日与纵谈，赓唱为乐。○蔡氏藏公戊戌《上云帆先生书》云：“子坚真率，久乃益亲。在署吟咏，必